

Bagian Sekolah-Sekolah,
Kementerian Pelajaran Malaysia,
Tingkat 12-14, Bangunan Bank Pertanian,
Leboh Pasar Besar,
Kuala Lumpur.

Telefon : 922066
Kawat : 'PELAJARAN'

KP(BS) 8591/Jld. II/(24)

14hb. Jun, 1984.

Semua Pengarah Pelajaran Negeri,
Malaysia.

YB. Datuk/Tuan,

SURAT PEKELILING IKHTISAS BIL. 4/1984

Perhimpunan Sekolah

Tujuan surat pekeliling ini adalah untuk memberi panduan dan menegaskan lagi kepada pihak sekolah tentang mustahaknya diadakan perhimpunan sekolah.

2. Perhimpunan sekolah hendaklah diadakan pada tiap-tiap minggu persekolahan dan hendaklah dianggap sebagai satu majlis rasmi di peringkat sekolah. Tujuan mengadakan perhimpunan sekolah ini adalah untuk menyemai, menanam dan memupuk semangat cinta dan taat setia kepada negara, serta meningkatkan lagi disiplin dan sifat-sifat keteladanan di kalangan murid-murid. Untuk mencapai matlamat-matlamat tersebut, perhimpunan sekolah harus mewujudkan satu suasana yang teratur, bertertib dan penuh hormat, di mana setiap orang dalam perhimpunan itu hendaklah mematuhi nilai, norma dan keteraturan perhimpunan tersebut.

3. Berikut adalah panduan mengenai pengelolaan perhimpunan sekolah:—

3.1 Masa

- 3.1.1 Perhimpunan sekolah pada hari pertama minggu persekolahan adalah digalakkan.
- 3.1.2 Bagi sekolah pagi, perhimpunan sekolah adalah di sebelah pagi dan bagi sekolah petang, perhimpunan pada waktu akhir adalah digalakkan. Semua pelajaran pada hari itu hendaklah disesuaikan supaya dapat berjalan kesemuanya.
- 3.1.3 Sekolah sekolah yang mempunyai dua sesi pagi dan petang perhimpunan beramai-ramai adalah digalakkan. Sekolah sekolah yang

mempunyai dewan atau lain-lain kemudahan yang boleh menampung semua murid sidang pagi dan petang, hendaklah mengadakan perhimpunan beramai-ramai ini setelah tamat sidang pagi tetapi sebelum bermulanya sidang petang.

3.2 Aturcara

3.2.1 Perhimpunan sekolah antara lain mengandungi:-

- 3.2.1.1 Nyanyian Lagu Kebangsaan Negara Ku/dan Lagu Kebangsaan Negeri/dan Lagu Sekolah (jika ada).
- 3.2.1.2 Upacara menaikkan bendera.
- 3.2.1.3 Upacara membaca ikrar Rukunegara.
- 3.2.1.4 Ucapan Guru Besar.
- 3.2.1.5 Lain-lain perkara yang difikirkan perlu bagi mencapai tujuan perhimpunan.

3.2.2 Perhimpunan sekolah hendaklah dijalankan dengan ringkas dan tidak mengambil masa yang berlarutan

4 Perhatian

Pihak sekolah adalah dinasihat untuk mengambil perhatian dan tindakan-tindakan berikut:-

- 4.1.1 Surat Pekeliling 'Am Bilangan 23, Tahun 1966, mengenai 'Lagu Kebangsaan' bertarikh 29hb. November, 1966, keluaran Jabatan Perdana Menteri. (disertakan bersama)
- 4.1.2 Surat Pekeliling Ikhtisas Bil. 4/1975 mengenai 'Nyanyian Lagu Kebangsaan "Negaraku"', bertarikh 20hb. Mei, 1975.
- 4.1.3 Surat Pekeliling Ikhtisas Bil. 8/1975 mengenai 'Nyanyian Lagu Kebangsaan/Lagu Negeri dan Mengibar Bendera Persekutuan/Bendera Negeri di sekolah-sekolah/Maktab-maktab Perguruan', bertarikh 8hb. September, 1975.
- 4.2 Semua guru dan murid hendaklah sama-sama berada di dalam majlis perhimpunan itu dan bersama-sama menyanyikan Lagu Kebangsaan, Lagu Negeri dan/atau Lagu Sekolah (jika ada) dengan betul dan penuh bersemangat.
- 4.3 Kehadiran dan ketepatan waktu guru hendaklah diperhatikan dengan penuh perhatian dalam perhimpunan ini.


- 4.4 Perkara-perkara yang boleh meninggikan lagi moral, disiplin dan perpaduan, menaikan semangat kerajinan dan keusahaaan serta membentuk sikap murid-murid ke arah yang lebih positif adalah digalakkan untuk disampaikan kepada murid-murid dalam perhimpunan.
- 4.5 Pihak sekolah tidak boleh menggunakan perhimpunan itu sebagai tempat untuk menjalankan hukuman kepada murid-murid, mencaci, menghasut atau mengambil sebarang tindakan yang boleh memalukan seseorang murid atau lain-lain pihak.

5. Harap maklumkan kandungan surat pekeliling ini kepada semua Guru Besar.

Sekian

'BERKHIDMAT UNTUK NEGARA'

Saya yang menurut perintah,



(DATO' HAJI IDRIS BIN HAJI TAJIN)

Bahagian Sekolah-Sekolah,
Dep. Ketua Setiausaha,
Kementerian Pelajaran Malaysia

- s.k.
1. Setiausaha Sulit kepada Y.B. Menteri Pelajaran Malaysia.
 2. Setiausaha Sulit kepada Y.B. Dato' Khalil bin Yaakob, Timbalan Menteri Pelajaran.
 3. Setiausaha Sulit kepada Y.B. Dr. Tan Tiong Hong Timbalan Menteri Pelajaran.
 4. Ketua Setiausaha, Kementerian Pelajaran.
 5. Ketua Pengarah Pelajaran, Kementerian Pelajaran.
 6. Timbalan Ketua Setiausaha I, Kementerian Pelajaran.
 7. Timbalan Ketua Pengarah Pelajaran I, Kementerian Pelajaran.
 8. Timbalan Ketua Pengarah Pelajaran II, Kementerian Pelajaran.
 9. Timbalan Ketua Setiausaha II, Kementerian Pelajaran.
 10. Ketua-Ketua Bahagian, Kementerian Pelajaran.
 11. Ketua Jemaah Nazir Sekolah Perskutuan, Kementerian Pelajaran.
 12. Pegawai Khas I kepada Y.B. Menteri Pelajaran.
 13. Unit Hal Ehwal Awam, Kementerian Pelajaran.

Jabatan Perdana Menteri,
Jalan Dato' Onn,
Kuala Lumpur.

P.M. 10164 Vol II

29hb. November, 1966.

SURAT PEKELILING 'AM BILANGAN 23 TAHUN 1966

Lagu Kebangsaan

Pada masa yang sudah-sudah, pernah terdapat, Lagu Kebangsaan tidak dimainkan dengan cara yang betul dan tertib sebagaimana yang dikehendaki oleh Surat Pekeliling 'Am Jabatan ini Bilangan 3 Tahun 1959. Pernah juga terdapat bahawa Lagu Kebangsaan telah tidak dimainkan langsung pada akhir majlis-majlis yang bercorak Kebangsaan atau "National" dan juga majlis-majlis yang lain. Oleh hal yang demikian, maka Surat Pekeliling ini adalah diperedarkan dengan tujuan untuk memberi panduan dalam masa hadapan tentang cara-cara bagaimana Lagu Kebangsaan "Negara Ku" harus dimainkan dengan cara yang betul dan sesuai.

1. Lagu Kebangsaan ada tiga bentuk sebagaimana berikut:

(i) Lagu "Negara Ku" yang penuh (Full Version of National Anthem)

Ini ialah salinan untuk diajarkan kepada kanak-kanak sekolah menyanyikannya. Ia boleh juga digunakan di khalayak ramai apabila dinyanyikan atau dimainkan oleh Orkes atau Pancaragam. Walau bagaimanapun apabila digunakan untuk memberi hormat (Salute), salinan penuh ini hanya boleh digunakan untuk memberi hormat kepada D.Y.M.M. Seri Paduka Baginda Yang di-Pertuan Agong atau bagi menghormati D.Y.M.M. Seri Paduka Baginda Timbalan Yang di-Pertuan Agong pada masa Baginda menjalankan tanggungan-tanggungan Yang di-Pertuan Agong atau bagi menghormati seseorang dari Raja-Raja Melayu yang dilantik menjalankan tanggungan-tanggungan Yang di-Pertuan Agong menurut Undang-Undang Yang di-Pertuan Agong (menjalankan tanggungan-tanggungan) Tahun 1957, atau boleh digunakan pada masa Panji-Panji di-Raja D.Y.M.M. Seri Paduka Baginda Yang di-Pertuan Agong dibuka bagi menandakan kehadiran Baginda.

(ii) Lagu "Negara Ku" yang mengandungi lapan (8) baris yang mula-mula dan lapan (8) baris yang penghabisan. (Salinan ringkas atau "Abridge Version"):

Salinan ini ialah untuk memberi hormat dalam semua Majlis-Majlis Rasmi kepada

(a) D.Y.M.M. Seri Paduka Baginda Raja Permaisuri Agong;

- (b) T2.Y.Y. Gabenor Melaka, Pulau Pinang, Sarawak, dan Yang di-Pertuan Negara Sabah;
- (c) Wakil rasmi D.Y.M.M. Seri Paduka Baginda Yang di-Pertuan Agong apabila D.Y.M.M. Seri Paduka Baginda Yang di-Pertuan Agong diwakili oleh salah seorang D.Y.M.M. Raja-Raja Melayu.

Dalam perkara ini, Lagu Kebangsaan Negeri D.Y.M.M. Raja Melayu yang berkenaan hendaklah dimainkan dahulu semua sekali kemudian barulah diikuti dengan Lagu Kebangsaan salinan ringkas ini;

- (d) Wakil-wakil Diplomat D.Y.M.M. Seri Paduka Baginda Yang di-Pertuan Agong di Negeri-Negeri Komonwel dan Negeri-Negeri Asing.

Salinan ini hendaklah juga dimainkan pada masa Majlis Minum Selamat Ke Bawah D.Y.M.M. Seri Paduka Baginda Yang di-Pertuan Agong diiringi dengan muzik.

- (iii) Salinan ringkas mengandungi lapan (8) baris yang penghabisan.

Salinan ini dimainkan apabila sahaja tamat sesuatu hiburan dan lakonan bagi khalayak ramai.

3. Lagu Kebangsaan di Majlis-Majlis Perayaan Persekutuan

Di dalam Majlis-Majlis Perayaan Persekutuan, jika sekiranya D.Y.M.M. Seri Paduka Baginda Yang di-Pertuan Agong ataupun wakilnya tidak berangkat hadir, tetapi salah seorang daripada D.Y.M.M. Raja-Raja Melayu ada berangkat hadir, maka Lagu Kebangsaan salinan ringkas hendaklah dimainkan pada akhir Majlis itu iaitu setelah Lagu Kebangsaan Negeri D.Y.M.M. Raja Melayu yang berkenaan itu telah dimainkan.

4. Lagu Kebangsaan yang dimainkan di Majlis-Majlis Perayaan Negeri

- (a) Apabila D.Y.M.M. Seri Paduka Baginda Yang di-Pertuan Agong atau wakilnya berangkat ke Majlis Perayaan Rasmi Negeri (State Functions), maka Lagu "Negara Ku" yang penuh hendaklah dimainkan selepas memainkan Lagu Kebangsaan Negeri yang berkenaan.
- (b) Dalam Majlis-Majlis sama ada rasmi ataupun tidak rasmi di mana wakil D.Y.M.M. Seri Paduka Baginda Yang di-Pertuan Agong tiada berangkat hadir, jika hendak memainkan Lagu Kebangsaan "Negara Ku" maka salinan ringkasnya hendaklah dimainkan selepas memainkan Lagu Kebangsaan Negeri yang berkenaan.

5. Menghormati Lagu Kebangsaan

Segala daya usaha hendaklah dijalankan oleh pihak-pihak yang berkenaan dengan cara mengajar dan memberi teladan untuk menggalakkan orang ramai menghormati Lagu Kebangsaan sewaktu dimainkan iaitu dengan berdiri dan diam tegak.

6. Lagu Kebangsaan yang penuh (Full Version) tidak sekali-kali boleh dimainkan selain daripada di Majlis-Majlis sebagaimana yang tersebut di perenggan 2(i) di atas. Dalam Majlis-Majlis yang lain sama ada rasmi ataupun tidak rasmi, maka Lagu Kebangsaan salinan ringkas yang mengandungi lapan (8) baris yang mula-mula dan lapan (8) baris yang penghabisan, dan Lagu Kebangsaan salinan ringkas bolehlah dimainkan mengikut perenggan 2(ii) dan (iii) 3 dan 4.

7. Surat Pekeliling Jabatan ini Bilangan 3 tahun 1959 adalah dibatalkan.

Dibahagi-bahagikan kepada:

S.U2.T./S.U2. Kementerian
(Dengan cukup salinan untuk Ketua-Ketua Jabatan)
Y.B. S.U2. Kerajaan Negeri, Malaysia Barat.
Y.B. S.U. Kerajaan Negeri, Sarawak, Kuching.
Y.B. S.U.T. kepada Ketua Menteri.

(TAN SRI ABDUL JAMIL BIN ABDUL RAIS)
Setiasusaha Tetap,
Jabatan Perdana Menteri.